

Politik Baru Malaysia? Seruan Buat Pemuda

tulisan:

Muhammad Saufy Rohmad

Sukar untuk saya nyatakan perasaan didalam tulisan. Kerana biasanya semangat itu terbakar didalam ucapan dan pernyataan. Saya cuba untuk menyatakan harapan didalam jiwa ini agar dapat difahami dan dimengerti oleh pembaca yang saya kasihi sekalian.

Pemimpin adalah seorang insan yang memberi pengertian yang baru. Membawa kehidupan menuju cahaya baru. Membangkitkan semangat menuju tujuan besar dan mampu dirasai bersama.

60 tahun kita merdeka dari British setelah ratusan tahun penjajahan. Kita belum mengerti siapa diri kita yang sebenarnya. Ataupun kita belum pernah bertanya sebenarnya siapa diri kita? Atau kita pernah mengetahui tetapi kita merubahnya.

Masa lampau yang rumit akan sedikit demi sedikit terpadam sekiranya kita ghairah menuju masa depan yang gemilang bersama-sama. Dan masa depan ini perlu besar, sehingga kita melupakan kemusykilan masa lampau dan bekerja siang dan malam menuju tujuan itu.

Permainan politik peninggalan tuan-tuan lama kita tertanam begitu dalam didalam peribadi sebahagian besar dari kita. Ini meninggalkan jurang besar diantara realiti zaman dan kesan-kesan penjajahan. Jurang ini mencipta kebosanan yang terlalu besar dikalangan generasi baru, yang berada ditengah-tengah lintasan laju maklumat yang hadir setiap 0.001 saat atau mili saat.

Besarnya konflik antara kita puluhan tahun telah membuatkan musuh-musuh kekenyangan dan para pembelot antara kita juga telah muntah memakan wang dan harta suapan yang cukup untuk memberi makanan terbaik kepada 7 generasi setelah 7 generasi.

Pembelot telah menjadi hero yang tidak pernah diragukan. Sehingga perasuah itu disamakan dengan pemimpin negara. Dan ianya sangat tidak kelihatan. Suara dan jeritan pembebasan, ketinggian budi dan kehebatan cita-cita membangun peradaban hanya nyanyian indah di pentas-pentas pembangkang, ataupun hanya mampu dibangun didalam ruang lebih kecil seperti di badan-badan bukan kerajaan dan kamar-kamar kecil gerakan perubahan.

Tema kemajuan ketamadunan adalah gula-gula. Ketika rakyat terus di candu dengan pemikiran yang sama. Puluhan kali ganda telah perlahan akan gelombang kemajuan dek kerana ditahan oleh gema-gema kebodohan yang dilaungkan oleh pemimpin yang hanya ingin merasakan kemenangan dengan segera dan bukan mempertahankan kemenangan dengan cara yang bijaksana.

Jauh saya berlegar di jalanan. Mari kita definisikan apa dan bagaimana politik baru itu. Dibawah saya jelaskan apa yang saya maksudkan dengan politik baru Malaysia untuk kita perdebatkan bersama.

1. Politik Baru adalah politik menuju tujuan tinggi peradaban. Politik baru adalah politik yang meletakkan tujuan jelas kepada puncak ketinggian pertiwi. Menjadi negara kaya raya terbaik didunia yang menaungi dan menyebarkan kesejahteraan. Dengan tujuan ini seluruh isi rakyatnya umpama tersedar dari lamunan dan berjiwa baru untuk menuju tujuan itu. Pejual kuih tepung pelita berimpian untuk memasarkan kuihnya ke seluruh dunia, dan menjadi multi jutawan kuih yang belum pernah dimimpikan oleh generasi sebelumnya. Pembuat parang akan memajukan industri nya mencipta parang terbaik didunia. Inilah isi pertama dari politik baru, mencipta semangat baru yang umpama bakaran yang menggelorakan semua isi rakyat untuk maju menuju keluar biasaan.

2. Politik baru adalah politik keberanian. Politik yang menuju kemandirian. Dari peringkat kerajaan sehingga pekerja bawahan. Tiada lagi mengambil jalan mudah. Tiada lagi projek ali baba mega yang bermodalkan 1 juta tetapi menjualnya menjadi 100 juta. Tiada lagi FDI ratusan billion dan akhirnya menghambakan putera-puteri terbaik anak bangsa menjadi kuli kepada jenama besar dunia dengan hanya membuat kerja rutin yang menghina kebijaksanaan kita. Politik berani adalah politik yang mencongkel seluruh potensi rakyat. Mencipta sendiri. Membuat sendiri. Tidak mudah kerana puluhan tahun ahli politik telah ditipu oleh penjual yang hanya mengimport jenama asing. Politik ini adalah inti kepada politik baru. Membina negara yang mandiri, berdiri atas diri sendiri. Dan akhirnya kita akan menjadi pengeluar yang hebat. Menjual bukan sahaja produk tempatan, tetapi cara fikir, budaya dan semangat dari jiwa kita yang hebat juga akan diikuti dan ditekuni oleh dunia.

3. Politik baru adalah politik yang merubah kebiasaan dan pemikiran. Merubah mentaliti hanya menunggu bantuan kerajaan kepada menjadi manusia yang berusaha atas kudrat sendiri, dan malu untuk meminta bantuan dari orang lain. Pemikiran yang merasakan bekerja sendiri dengan tangan sendiri itu lebih mulia dari bekerja kerajaan. Menjadi pedagang itu lebih terhormat dari menjadi PTD. Pemikiran yang terus bergerak menuju kemajuan dan idea-idea baru, dari hari ke hari. Pemikiran yang tidak banyak bercakap mengenai orang lain dan pencapaian mereka, tetapi terus mencari idea baru untuk memajukan diri dan keluarga. Bermula dari pemimpin, politik baru ini perlu ditunaskan.

4. Politik Baru bukan perebutan dan komplot politik murahan, tetapi ia adalah pertarungan ideologi. Politik baru adalah politik yang gentleman. Penuh dengan ilmu dan keyakinan. Ia adalah perlumbaan pemikiran dan ketinggian wawasan. Ia bukan komplot yang berubah hari demi hari mengikut tawaran yang terbaik yang di tawarkan dari kedua-dua belah pihak. Politik ini adalah politik kehormatan. Bukan politik hanya untuk jawatan sehingga rakyat muak, mual dan melihatnya begitu jijik, penuh dengan kepentingan diri.

5. Politik baru itu tenang kerana ilmu dan akhlak. Politik baru itu tenang. Tidak perlukan cacian dan makian didewan rakyat. Hanya perlu keyakinan dengan hujjah dan kemuliaan cara penyampaian dengan penuh keberibadian. Itu menjadi tanda politik yang penuh kehormatan. Juga dipatahkan dengan hujjah yang lebih baik dengan cara yang lebih indah. Musuh saling menghormati dan mengakui. Berbeza hujjah dan pendapat, bukan membenci peribadi.

6. Politik baru membawa nilai baru. Values. Menyerap nilai baru perlu jeritan yang bukan perlahan. Umpama bangsa yang tiba-tiba dihancurkan ketika perang. Tiba-tiba perlu menjadi rajin. Tiba-tiba perlu belajar untuk hidup susah. Ketika itu nilai baru akan dipaksakan dan akan diserapkan mau atau tidak kerana untuk survival kehidupan. Menanam nilai baru bukan mudah. Lebih sukar dari menukar

kerajaan itu sendiri. Mungkin 10 kali tukar kerajaan baru nilai suatu bangsa akan berubah. Namun, inilah politik baru. Kepimpinan yang berubah nilai yang mendasari suatu bangsa dan tanahair.

7. Politik baru adalah politik yang tidak takut untuk berbeza. Berbeza itu cantik. Semakin berbeza akan semakin tinggi entropy atau maklumat didalam sesuatu benda. Berbeza itu bukti kita berani untuk mencuba. Mencuba itu adalah kemenangan kepada pengalaman. Semakin awal kita gagal semakin awal juga kita akan berjaya.

Saya senaraikan 7 nilai-nilai politik baru Malaysia. Sebelum saya menutup tulisan ini, saya sertakan seruan, pujian dan deklarasi martabat yang tinggi yang telah Allah swt letakkan kepada kita semua:

Kamu (wahai umat Muhammad) adalah sebaik-baik umat yang dilahirkan bagi (faedah) umat manusia, (kerana) kamu menyuruh berbuat segala perkara yang baik dan melarang daripada segala perkara yang salah (buruk dan keji), serta kamu pula beriman kepada Allah (dengan sebenar-benar iman). Dan kalaulah Ahli Kitab (Yahudi dan Nasrani) itu beriman (sebagaimana yang semestinya), tentulah (iman) itu menjadi baik bagi mereka. (Tetapi) di antara mereka ada yang beriman dan kebanyakan mereka: orang-orang yang fasik. (3:110)

Hanya pada Allah lah tempat kita berserah dan hanya kepada Nya lah kita semua akan kembali.

Penulis adalah Pensyarah Kanan dalam Bidang Kejuruteraan Komputer di Universiti Teknologi MARA. Aktif didalam Gerakan Pelajar sejak Universiti. Juga terlibat secara langsung didalam projek-projek Inovasi serta rekacipta Industri 4.0. Memiliki kefahaman muslim moderat progressif yang ingin membina Malaysia menuju negara Maju dan mendapat keredaan Allah swt. Penulis adalah Ketua Pemuda Amanah Putrajaya.